

**La Lettre Jèrriaise .**

**Bouônjour, ch'est Ken Vibert dé Grosnez tchi vos présente la lettre Jèrriaise aniet lé 19 dé Juîn 2021.**

**Comme tchiques-uns d'vous l'savez bein, y'a un groupe dé gens tchi s' rencontrent ensembl'ye au Vèndrédi matîn pour distchuter en Jèrriais. J'somme entre dgix et vîngt d'nous tchi s'rêunissent à Jersey Pearl, au but d'la Grande Route des Mielle, ou comme bein d'vous l'ont connue toute vouot' vie "La Route des Cinq Miles". Atout un café jé r'pathons touos les mal dé la vie, disant tréjous que j'pouôrrêmes faithe bien mus qu' les êlus tchi sont dans nos États. D'aut' fais, j'pâlons du temps pâssé, ou comme l'aut' semaine d'la pêque. Ben Spink, qu'ou connessiz bein car i' vos a présenté la lettre Jèrriaise plusieurs fais, nos dit tch'il avait arrangi aue un anmîn pour am'ner san mousse à basse ieau, pour li' explitchi lé dangi, mais étout lî montrer tch'est qu'nou-s-y trouve dans les mathes et souos les gallos. I' nos dit tch' il' eûtent bien d'la chance car il' y trouvitent un honnard et même un ormér. Ch'est r'merquabl'ye comment qu' nou peut s'ramémouaither de bien des choses tchi s'arrivitent quand nou 'tait mousse, et j'lus racontis l'histouaithe dé man grand-grand-pèthe 'Douard Le Feuvre tchi faisait la pêque. Il avait un baté pêtcheux d'treize pids bordé à clyîn , tchi gardait au bas d'la falaise à La Cotte à la Chèvre tchi s' trouve entre La Grève au Lanchon à Pliémont et les ruines du Châté d' Grosnez. I' pêchait aue san vaîthîn et bouôn anmîn Ph'lip**

Gallianne et j'mé rapelle quand j' 'tais tout mousse, j'avais pas pus d'quatre ou chinq ans, d'aller aue ma grand-méthe les vaie. Il' avaient touos les deux pus d' septante ans mais il' allaient acouo faithe la pêque ès Mintchièrs. Comme i' n' y' avait pas d'engîn dans san baté i' fallait d's' avithons pour lé faithe nagi. I' m'ttait huit heuthes pour y' aller et dgiêx heuthes pour èrvénîn avec lé baté chèrgi d' païsson, auprès deux ou trais jours dé pêque là-bas. Aue ma grand-méthe j'allions nos assiéthe sus un grand gallot au Châté d' Grosnez pour les vaie lus êcarter d' la falaise pour trouver les couothants tch'allaient faithe lus avithonnage bein pus aîsi. J'restionmes à les dgetter jusqu'au moment que nou n' les viyait pas d'autre.

Ma grand-grand-méthe, tch'avait fait lé caltchul bien des fais nos dit quand tchi qu'il' allaient èrvénîn, et a tchi moment qué nou-s-allait pouver les r'vaie. Avec ma grand-méthe j' èrtouônnionmes au Châté aue une longue veue pour les vaie rappréchi d'la côte. Une fais tch' il' avaient pâssé la pointe du Châté, j'nos en r'vînmes au haut d'la falaise en d'ssus d'amathage. Dé là, j'pouvions les r'garder prendre lus pouque à païsson sus lus dos et monter lé c'mîn d' pid tchi monte la falaise. Et j'vos asseuthe que ch'n'est pon aîsi à monter même sans eune poutchie d' païsson sus l'dos. I' 'taient solides ches deux vièrs pêcheurs, et achteu j' sis d'la même âge qué ieux, j' sis bein seux

qué jé pouôrrais janmais en faithe autant. Et bien, mèrcie d'm'aver êcouté, et  
à la préchine.